

重法隱山

元，法聞，七歲出家。後從溫公學法華、般若、唯識、因明及四分律。溫公謂聞任重道遠，託以弘傳之寄；聞對佛像灼肌燃指，刺血書經，以彰重法。遂隱五台山，不踰閫者六載，讀藏教五千卷者三番。帝師歎曰：「漢地乃有此僧耶！」尋以安西王命，開講筵義善寺，天子聞而徵之。至闕，詔居大原教寺，賜銀章一品；求戒者皆從受焉。延祐四年三月二十四日坐逝。

廢寺隱居

元，世愚，衢州西安縣人。歷參布衲，及斷崖、中峯諸大老，後得法於止巖。歸西安烏石山廢寺，結茆以居，影不出山者六載。名聞於朝，遣重臣賜名香，金襴法衣，加號弘辨。至正間，有龍眠、古望等五剎新剝，皆虔懇延師為開山第一祖，乃不得已應之。

總論

或問：「世尊始成正覺即演華嚴，乃有沙彌講經，年甫七歲，如必歷年久隱，當如眾生何？」不知古人之遲重，非獨善忘世也。道高而志愈勤，心明而事彌慎。水邊林下，長養聖胎，待夫果熟香飄，龍天推出，舉而措之裕如矣！子見如來一代之利生，而不知三祇之熏鍊，又安知七歲沙彌非多生之熟習耶？佛法不是鮮魚，那怕爛卻？斯言雖小，可以喻大。